

*Neapolis* uno stadio, putoque fuisse oppidum *Thebes*. Huic fonti adjacet *pradium*, quod dedit Jacob filio suo Joseph, Gen. XLVIII. 22. vallis scilicet quædam longa & fertilis. A *Sichem* numerantur quatuor leucæ contra Austrum ad *Lemnam*, casale valdè pulchrum, situm juxta viam ad dexteram, quæ ducit Jerusalem. Est & alia *Lemna*, civitas in tribu *Juda*, hæc autem est in tribu *Ephraim*. A *Lemna* eundo contra Austrum sunt quatuor leucæ ad oppidum *Magnas* nomine, quod fuit terminus Australis tribus *Ephraim*, hodiè verò dicitur *Bira*, & est de dominio militiæ templi. A *Magnis* versus Austrum est una leuca ad *Gabaa Saulis*, ubi oppressa fuit uxor *Levitæ*, & ob facinus illud ferè tota tribus *Benjamin* deleta, Jud. Capp. XIX. & XX. ubi & *Saul* filius *Kisch*, primus rex *Israël*, natus fuit, 1 Sam. xv. 34. A *Gabaa* euntibus una leuca contra Austrum occurrit *Rama* civitas, sed quæ hodiè est villa, sita in monte ad sinistram itineris, ducentis in Jerusalem. Hinc tres sunt leucæ eundo contra Austrum ad Civitatem *Hierosolymitanam*, de qua infra. Hic verò revertar ad *Sichem*, & describam iter, quod ab ea ducit versus Orientem. Itaque à *Sichem* versus Orientem, ad *Jordanem* procedendo, quatuor sunt leucæ ad *Ennon*, oppidum benè munitum, atque optimis abundans terræ nascentibus, fuit autem de sorte *Ephraim*. Ab *Ennon* contra Orientem quatuor sunt leucæ ad *Phasellum* casale, situm in descensu montis *Ephraim*, tribus leucis à *Jordane* in campatribus, ubi torrens *Charith* descendit de monte, in quo loco mansit *Elias*, quando corvi ei deferebant cibum mane & vespere, 1 Reg. XVII. 5, 6. Sunt & aliæ villæ in Terra Sancta, quæ *Rama* vocantur, una juxta *Thecnam* in via, qua iter in *Hebron*, alia in tribu *Nephtalim* non longè à casali *Sephet*, tertia in *Silo*. Et omnes istæ villæ jacent in collibus excelsi: nam *Rama* excelsum interpretatur. A *Phasello* ad sinistram una leuca versus terram *Taphue*, est castrum *Dooch*, ubi *Tholomus* filius *Abochi* insidiosè cepit *Simonem Machabæum*. In loco isto conspicitur terra *Galaad*, & duarum tribuum atque dimidiæ terra *Esebon*, & montana *Moab*, mons *Abarim* & *Phasga* atque *Nebo*: & descenditur hinc in campestria *Jordanis*, quæ loca sunt plana usque in *Jericho*, & ultra, per totum descensum *Jordanis*, usque ad mare *Salinarum*. Sciendum etiam, quod ab ortu *Jordanis* sub monte *Libano* usque ad desertum *Pharan* per centum ferè milliaria, *Jordanis* ipse in utraque ripa campos habet latos & amœnos, atque prata virentia, positis hinc inde altissimis montibus, in quos hæc arva desinunt, qui & usque ad mare Mortuum juxta *Jordanis* rivum protenduntur. De *Phasello* contra Austrum quinque sunt leucæ usque ad *Galgalam*, ubi filii *Israël* transito *Jordane* longo tempore sunt castrametati, Jos. IV. 19. A *Galgalis*, si versus *Jericho* vadas, habes ad dextram montem, *Quarentanum* dictum, distantem media leuca à *Galgalis*, ubi, scilicet, Dominus quadraginta diebus & noctibus jejunavit, Matth. IV. 2. Est mons ille altus, & ascensu difficilis, habens ab uno latere fontem, cujus aquas amaras sanavit & dulcoravit *Elisæus*, 2 Reg. II. 20, 21, 22. cujus aquæ fluunt juxta locum *Galgala* à parte Australi, & illicò in tantum succrescunt, ut impellant totas moles, sed postea in rivos secreta, horros & prata irrigant. A *Galgala* dimidia leuca contra Austrum est vallis *Achor*, ubi lapidatus fuit *Achan* ob furtum anathematis, Jos. VII. 25. Item à *Galgala* per unam leucam contra Orientem est sita *Jericho*, civitas olim famosa, nunc autem habet octo domos, vix nomen villæ sortita. A *Jericho* per duas leucas versus *Jordanem* est sacellum, extructum in honorem Sancti Joannis Baptistæ, ubi putatur Dominus ab eo baptizatus, Marc. I. 9. alii verò id factum putant in *Salim*. A *Jericho* sunt duæ leucæ versus mare Mortuum ad *Bethagla*, ubi filii *Israël* planxerunt patrem suum *Jacob* defunctum, quando eum tulerunt de *Ægypto*, Gen. L. 10. & distat una leuca à *Jordane*. A *Jericho* tres numerantur leucæ ad Mare Mortuum, quod est lacus *Asphaltis* seu bituminis, quod etiam mare salis nominatur, dividitque Arabiam à *Judæa* & terminatur ad ejus littora terra *Moab* & *Ammon*, itemque mons *Seir*, de quibus supra mentionem fecimus. Circa medium ejus, in littore orientali ostenditur castrum *Mozera*, quod olim *Petra deserti* vocabatur, nunc verò *Crack* dicitur, munitum apprime, quod *Balduinus* rex *Hierosolymitanus* restauravit, ut regnum illud ampliaret, sed à *Soldano* nunc tenetur, qui in eo reponit the-